



Cilgia Rest concentrada vi da la lavur.

FOTOS ANNETTA JANKA-ZINI

«Eu nu bad cuntravent causa ch'eu sun üna duonna»

Avant quatter ons ha la Banca Chantunala Grischuna tschernü a Cilgia Rest sco prüma duonna il post da manadra regionala, respunsabla pellas agenturas da la regiun Engiadina Bassa, Samignun e Val Müstair. A la FMR ha ella raquintà davart sia via e las sfidas dad esser manadra in quella regiun.

ANNETTA JANKA-ZINI/FMR

«Eu nu less ir pro la banca» vaiva *Cilgia Rest* dit sco giuvenila cun seis bap chi vaiva üna pitschna filiala da la Banca Chantunala Grischuna (BCG) in chasa ingio ch'els stavian a Susch. Ed uossa è la svesa pro la BCG e quai fingià passa 24 ons. Daspö il principi dal 2020 è la manadra da las agenturas da la banca chantunala da la regiun Scuol. Ella d'eira insomma la prüma duonna pro la BCG chi mai na ün tal post.

Üna carriera fatta illa chasa da la banca chantunala

Davo la scuola secundara ha Cilgia Rest (49) fat ün giarsunadi da commerzi sül cumün ed es lura sco ch'ella disch restada pichada il commerzi. Subit davo il giarsunadi è la rivada pro la Banca Chantunala Grischuna ingio ch'ella es amo adüna: «Eu sun statta a Samignun sco cusgiadra ed al fanestrigl. Lura n'haja pudü müdar oura Scuol e n'ha fat mia via quia in chasa», decler la sia carriera. Dürant tschinch ons ha la fat üna posa da la banca, nempè dal 2005 fin al 2010 provond oura ün pèr otras robas. Ella raquinta ch'ella saja ida ün pa in viadi, haja manà duos ons ün hotel e l'uffizi d'impostas. «Davo suna lura tuornada fich fich jent pro la banca chantunala dal 2010», disch'la explichond ch'ella haja realisà dürant il temp ch'ella d'eira davent da la banca cha l'equiliber tarter avair portas avertas per as sviluppar e pudair esser aint illa regiun saja fich bun pro la BCG.

Ella nu lavura be a Scuol, ma es eir bler a Cuoiria in sia posiziun sco commembra da la direcciun. Impli è la respunsabla per tuot las agenturas da la regiun, vuol dir a Samignun, in Engiadina Bassa ed in Val Müstair. Uschea daja minchatant dis ch'ella es in viadi e in na büro. «I po esser ch'eu n'ha ün di concentrà sün discuos cun collavuraturas e collavuraturas o lura ün di plain planisaziun e strategia o lura daja ün di ch'eu sun plainamaing pro'ls clients», declera la manadra e disch cha quai saja bel ch'ed es fich varià.

Curaschi, sustegn e fiduzcha da la banca

Cilgia Rest raquinta cha blera glieud saja statta stutta dal 2020 chi vaiva dat il müdamaint d'ün hom ad üna duonna sco manadra da las agenturas da la banca chantunala da la regiun Scuol. «A mai esa gnü fat curaschi da far quai pass e da m'annunzchar pella piazza», disch'la

cuntainta dad avair surgni il curaschi, il sustegn e la fiduzcha dals patruns da la banca invers ella per surtour uschè üna sfida. Ch'ella as sainta fich bain in seis post. Il lö, la cultura ed il clima da lavur tilla plaschan ed eir la lavur sco tala: «Nus eschan quia per far ün servezzan e pudain mincha di far alch bun ad inchiün e quai dà simplamaing ün bunischem sentimaint.» Cur ch'ella haja da dar inavant noschas novitas, lura as giavüschess'la ün mumaintin da far alch oter. «Quai tocca però pro e sch'ed es a favur dal resultat, lura as faja quai», restimesch'la la lavur ch'ella nu fa tant gient.

«Sch'eu vegn quia our d'porta, suna adüna «quella» da la banca.»

Cilgia Rest, manadra da las agenturas da la Banca Chantunala Grischuna da la regiun Scuol e commembra da la direcciun

«Nus eschan «quels» da la banca»

Scha Cilgia Rest nun es güsta in banca, daja ün lö, ingio ch'ella as sainta fich bain: «Quai chi'm tira our da banca la stà es ir in üert, aint illa merda e chavar intuorn. Quai am fa fich bain, causa cha la decida per mai e be per mai. Mias decisivus nun han in üert gronda influenza sün otra glieud e quai predscha in quel mumaint», decler'la seis equiliber dal muond finanzia. Eir uschigliö saja ella fich jent illa natüra per as schmuantar giوند in muntogna o culs skis. Ella gajaja eir gugent a viagir. Sia chasa e seis üert sajan per ella ün pa il lö per as retrar, sco ün'isla per esser sai sves: «Sch'eu vegn quia our d'porta, suna adüna «quella» da la banca.» Ella agiundscha cha la glieud nu cugnuscha be ad ella, dimpersè eir a suas collavuraturas e seis collavuraturas: «Nus eschan «quels» da la banca.» Cha quai saja però eir alch bellischem ed ün grond avantag schi va per fabricar sù fiduzcha cun clients.

Spordscher tuot ils servezzans illa regiun

Üna sfida permanenta pella Banca Chantunala Grischuna illas agenturas da la regiun Scuol saja da chattar la dretta glieud pellas lavurs chi fan: «Nus dovressan collavuraturas cun üna buna scolaziun e subit chi han quella, vain il marchà da lavur in tuot la Svizra uschè attractiv chi nu vöglian restar. Il purtret dal giuven chi va davent e fa sia scolaziun e tuorna ün di, quai es ün mitus chi nu dà plü», decler'la la situaziun illa regiun. Per evitar quai prova la BCG sco ch'ella agiundscha da scolar la glieud da fuond sù e da tilla guadagnar uschea pella BCG illa regiun. «Sco lezcha centrala vezza da mantegner plü blers servezzans pussibels illa regiun e la BCG perseguitessa eir quella strategia e nu vul as retrar da las regiuns», disch'la sperond chi nu saja amo lösch na uschè inavant chi nu's chatta plü la glieud chi po spordscher ils servezzans in tuot la regiun.

La banca chantunala e las duonnas

«Eu nu bad cuntravent causa ch'eu sun üna duonna», disch Cilgia Rest e declera cha dad esser sco duonna in ün post da manar maina otras sfidas ad ella co a seis collegas masculins: «Minchatant stögla forsia muosser daplü success per gnir recugnuschüda. Ma da tschella vart n'haja eir minchatant ün pa plü simpel.» Ella quita cha la banca chantunala haja programs aposta per duonnas, i'ls quals ella es eir adüna involvada. Impli decler'la cha la BCG haja üna fich buna quota da duonnas.

Eir *Daniel Daester* dal post da medias da la BCG, conferma sün dumonda da la FMR cha la gronda part dals collavuraturas da la banca saja duonnas: La fin dal 2023 d'eiran quai 55 %. Ma cha subit chi gajaja sül s-chalin da manar, lura crouda sün 21 %. Sül listess s-chalin sco Cilgia Rest daja amo üna duonna ch'ed es manadra da sectur, quai sun be plü 6,6 %. La Banca Chantunala Grischuna saja motivada da fuormar diversità sün tuot il s-chalins da l'ierarchia. Tenor Cilgia Rest stessa gnir plü normal cha eir homens lavuran parzialmaing per dar ajer a las duonnas da lavurar in pensums ün pa plü ots. Ella concluda: «Nus stessan avair bler daplü bunis exaimpels ingio cha duonnas fan lur via e nu's fan dependents aint in üna relaziun dal partenari o nöglia.» Ella sves es sainza dubi ün da quists bunis exaimpels.

ENGIADINA

Andrea Gilli es mort

Zieva üna malatia es Andrea Gilli mort ils 29 da favrer 2024, scu cha sia famiglia scriva illa annunzcha da morts. Dürant ils ans 2018 fin 2023 d'eira Gilli il president da la vschinauncha da Zuoz, fin ch'el ho do go sia carica.

Aunz lavuraiva l'hom da 68 ans traunter oter scu sviluppeder regiunel illa Regiun Engiadina Bassa – Val Müstair ed el d'eira eir il president dal cussagl administrativ da la Bieraria Engiadinaisa. (rtr/fmr)



Ils 29 da favrer 2024 es Andrea Gilli da Zuoz mort cun 68 ans dad üna malatia. FOTO MAD

MARATON



Già per la seguonda vouta ho la partenza dal Maraton Engiadinais gieu da gnir spusto quist an. Nouv cumainza la cuorsa a Silvaplaua sül pro dal center da surf. Intaut sun ils lavurants landervia. FOTOS HELENA MUSCA

Spusto la partenza aunch'üna vouta

L'organisaziun da la 54. evla ediziun dal Maraton Engiadinais as stu suottametter aunch'üna vouta a las capriolas da Petrus.

RTR/FMR

Be güsta aunz desch dis vaivan ils organisatuors già decis da spuster la partenza da Malögia a Segl, per que cha'l glatsch dal lej nu d'eira ferm avuonda per purter il pais da la bgera naiv e las maschinas per fer las loipas.

Uossa, niaunch'üna eivna aunz la partenza haun ils organisatuors aunch'üna vouta stuvieu spuster l'intera infrastruttura dal start, scu cha's po ler sülla pagina d'internet dal Maraton Engiadinais. Scu cha *Menduri Kasper*, il mainagestiu dal maraton disch invers RTR, fetscha que fich mel, da stuvair dispuoner uschè, ma la sgirezza stretta simplamaing sur tuot.

Nouv partiron ils bundant 14 000 curriduors da passlung davent da Silvaplaua. Cun agiundscher pussas rundas supplementeras a Surlej e traunter Schlarigna e Samedan, prouvan ils organisatuors istess auncha da rabler no ün traget traunter 38 e 40 kilometers lungezza.



Insé füss l'ultim termin per decider sto venerdì bunura, ma zieva avair viss las prognosas, haun ils responsabls decis già in gövggia: els paun duverer mincha ura chi haun auncha per metter ad ir l'infrastruttura e preparar la loipa per la partenza a Silvaplaua.